

**Андижон давлат университети хорижий филология факультети инглиз тили ва адабиёти йўналиши 1-босқич 111-гуруҳ талабаси
Маҳмудова Муаттарнинг “Озод ва обод Ватанга бахшида умр” ва
“Ислом Каримов асарларининг баркамол авлод тарбиясидаги аҳамияти” мавзусида ёзган иншоиси**

Режа:

1. Ватан – қалбим садоси
2. Мустақил давлатимиз асосчиси
3. Ислом Каримов – ўткир қалам соҳиби
4. Буюк инсон бошлаб берган йўл
5. Юракларда яшайсиз, азиз юртбошим!
6. Юрт ҳимояси – энг олий шараф

Ислом Абдуғаниевич ўз ҳаёти ва фаолиятининг мазмуни бўлган “Биздан озод ва обод Ватан қолсин!” деган эзгу ғояни илгари сурдилар ва бу даъват барчамизнинг қалбимиздан чуқур жой олди. У киши “Элим деб, юртим деб, ёниб яшаш керак”,-деган сўзнинг ғоясига бир умр амал қилиб, келажак авлодлар учун буюк ибрат мактабини яратдилар.

(Шавкат Мирзиёев)

Ватан! Шу кичик қароғимга сингган умр баҳоримни бахшида этганим.
Ватан! Ариғингдаги зилол сувга юзим чайганим, ҳар тонг тандирингдан узилган иссиқ кулчангдан тотганим.

Кўзимга зиё, дилимга малҳамим.

Ватан! Файзли кўчаларингни обод этган гулингман. Сенинг тафтингдан нур олиб, бағрингда ўсиб-унганим. Ҳар тун онажоним алласини тинглаб, кучоғингда ором олганим!

Ватан! Шаффоф туйғуларим кўзгуси. Бу кўҳна дунёдаги ёлғиз таянчим. Юрагим осмонида ўйиб битилган эзгу сўзимсан.

Ватан! Кўнгил ошенимининг маҳзун садолари. Ҳар бир оҳангида сенинг минг-минг ташбеҳинг. Лек улар сени таърифлай олмас. Чунки сен қўл етмас юлдузим, тубсиз денгиздаги марваридимсан.

Ватан! Бу борлиғимнинг бир парчаси, шарқироқ сойим. Япроқларга қўнган шабнамимсан.

Ватан! Юрагим қўърини “истило” этган “ғаним”имсан. Сенинг бу “истило”нг қалбимни шу қадар забт этдики, энди сенсиз яшамоқ мумкин эмас.

Ватан! Мен гулингман, осмонинг бўлгим келади. Сени севиб, сени куйлаб ўтувчи чечагингман. Бу мағрур бошим сен учун доим таъзимда!!!

Қайси давлат тарихига назар ташламайлик, халқининг дарди, миллатнинг қайғуси, унинг орзу-интилишлари, ўз элини мустақиллик деган бир улуг неъматга олиб боришга қодир бўлган буюк шахсларни табиатнинг ўзи инъом этади. Албатта, бунинг бевосита асоси сифатида ўрта асрларда диёримизда

муғуллар исканжаси авжига чиққан бир замонда Амир Темурнинг, шайбонийлар ва бошқа ҳукмрон табақалар ўртасида Заҳириддин Муҳаммад Бобурнинг, шўроларнинг, жадид уламоларимизнинг ватан, халқ, озодлик йўлида ҳақиқий қалқон бўлиб майдонга чиқишганини мисол тариқасида келтириб ўтиш мумкин. Замонамизнинг ана шундай буюк шахсларидан бири сифатида Ислом Каримовни юқорида келтириб ўтилган буюк шахсларга қиёсласак, асло муболаға бўлмайди.

Ҳақиқатан ҳам, Ислом Каримов маънан юксак фазилатларга эга бўлган, машҳур давлат ва сиёсат арбоби, талантли нотик, руҳшунос, шу билан бирга, эл-юртини, фуқароларини, айниқса, биз ёшларни севган ва ўз юртини халқаро ҳамжамиятга танитган инсон сифатида ёдимизда қолди. Мана шундай буюк шахснинг қийинчилик ва ташвишлар билан тўлиб-тошган ҳаёти ва фаолиятини кичик бир мақолада мукамал даражада баён қилиш, мураккаб, албатта. Лекин унинг буюк шахс, эркин фуқаролик жамияти ва бозор иқтисодиётига асосланган демократик давлат асосчиси ва бунёдкори сифатидаги ҳаёти ва серқирра фаолиятини ёритишда кўп кўп жилдли китоблар ёзишга арзийди.

Давлат арбобининг Ўзбекистон Республикасини янгидан ташкил топган мустақил мамлакат сифатида бозор иқтисодиёти, мукамал инфраструктура, замонавий бошқарув аппаратини яъни тизимини яратишда, мамлакатда ҳал этилиши жумбоқ бўлган муаммоларни тўғри қарорлар билан ечишда амалга оширган ишлари таҳсинга лойиқдир. У Фарғона воқеалари, Қўқон, Қувасой, Гулистон, Бўка ва Наманганда юзага келган қонли тўқнашувлар, турли зиддиятлар авжига чиққан бир пайтда Республикани жар ёқасидан қайтара оладиган инсон сифатида майдонга чиқди. Унинг бу низоларни олдини олишдаги хизматларини бутун халқимиз, шунингдек, хорижий давлат раҳбарларидан тортиб оддий халқигача юксак баҳолагани барчамизга аён, албатта.

Биринчидан, Президент нафақат сиёсат борасида балки ўз мамлакатида бир хил иқтисодий инқирозлардан тортиб, оддий халқининг масалаларида ҳам ҳақиқий қаҳрамонликлар кўрсатиб ўз олдига қўйган масалаларни мукамал даражада амалга ошира олди. Мамлакатимизда ҳуқуқий-демократик давлат, фуқаролик жамияти барпо этиш йўлида тинчлик ва барқарорликни сақлашда, аҳолини ижтимоий муҳофаза қилишда, иқтисодиётни тубдан ислоҳ қилишда, миллатлараро ҳамжихатликни асрашда, миллий армияни шакллантиришда, фуқароларнинг ҳуқуқ ва эркинликлари, уларнинг манфаатларини йўлга қўйиш, ривожлантиришдаги хизматлари бениҳоя катта бўлди. Хавфсизлик борасида бугунги кунда инсоният учун салбий оқибатлар келтириб чиқараётган глобал муаммоларга: диний экстремизм, халқаро терроризм, минтақавий можаролар масаласига алоҳида эътибор бериб, халқаро ҳамжамиятни ҳам ушбу масалаларга жиддий ёндашишга чорлаб, БМТ, МДҲ каби бир неча халқаро ташкилотлардаги чиқишларини таъкидлаш мумкин. Хорижий оммавий ахборот воситалари ҳамда давлат арбобларининг фикрларига кўра: “И.А.Каримов Президент сифатида ўз фикрларини ўз мамлакати Ўзбекистонга ҳам, дунёга ҳам такрор-такрор баён қила олди”.

Ўзбекистоннинг Биринчи Президенти Ислом Абдуғаниевич Каримов она Ватанимиз озодлиги, халқимиз фаровонлиги йўлида умрини бахшида этган юрт ўғлони сифатида тарихимизда ўчмас из қолдирди. Ислом Каримов зукко иқтисодчи ва моҳир сиёсатчи бўлиши билан бирга ўткир қалам соҳиби ҳам эди. Унинг асарларида халқнинг ташвиши ва орзу-истаклари ва инсонларнинг оғирини енгил қилиш билан боғлиқ ечимлар, одамзод учун ҳамма замонларда ҳам энг буюк бойлик бўлиб келган маънавиятнинг маъно-мазмуни, унинг инсон ва жамият ҳаётидаги ўрни ва аҳамияти, бу мураккаб ва серқирра тушунчанинг назарий ва амалий томонлари ҳар томонлама кенг қамровли фикр ва хулосалар орқали таҳлил этилганини кўриш мумкин. Айниқса, бугунги мураккаб глобаллашув даврида маънавият соҳасида вужудга келаётган долзарб муаммолар юзасидан қилган чиқишларида фуқарорларнинг дин ва эътиқоди билан боғлиқ ҳуқуқ ва эркинликлари, юртимизда диний қадриятларни қайта тиклаш, давлат ва дин муносабатларини тартибга солишга ҳам алоҳида эътибор қаратган: “Биз ота-боболаримизнинг муқаддас дини бўлган ислом динини кадрлаймиз, хурмат қиламиз. Шу билан бирга, фуқароларимизнинг эътиқод эркинлигини қонун асосида таъминлаш учун барча шарт-шароитларни яратиб бермоқдамиз. Аммо биз диндан сиёсий мақсадлар ва ҳар қандай ёвуз ниятлар йўлида фойдаланишга мутлақо қаршимиз. Бизнинг бу масалада йўлимиз аниқ ва қатъий: дин диннинг ишини, давлат давлатнинг ишини қилсин”.

Халқимиз маънавиятини асраш ва юксалтириш, айниқса, биз ёшларнинг қалби ва онгини турли зарарли ғоя ва мафкуралар таъсиридан сақлаш ва ҳимоя қилиш масалаларига катта эътибор қаратганликлари таҳсинга лойиқ.

Кўриниб турибдики, Ислом Каримов ўз асарлари ва нутқларида мамлакатимизни демократик янгилаш ва модернизация қилиш жараёнларини янги босқичга кўтариш, ижтимоий соҳалар – таълим-тарбия, илм-фан, соғлиқни сақлаш, маданият ва спорт тизимини изчил ривожлантириш билан бирга давлат ва дин муносабатларини, муқаддас динимизни соф ҳолда асраб-авайлаш, унинг халқимиз бирдамлиги, миллатлараро тотувликни таъминлашдаги ўрнига алоҳида эътибор қаратганлар.

Шундай экан, Биринчи Президентимиз Ислом Каримовнинг ғоят муҳим, ҳал қилувчи масалалар ўртага қўйилган асарларини мамлакатимизнинг барча таълим масканларида ўқув қўлланмалар тарзида тақдим этилиши, биз, ёшларнинг диний ва дунёвий билимларни уйғунликда ўрганиш, юртимизда олиб борилаётган сиёсатни тўғри англаб етиш ва Ватанга муносиб фарзандлар сифатида камол топишимизда муҳим аҳамият касб этади.

“Дунёга келган ҳар бир инсон ўз толеъи билан туғилиб, бу унинг тақдирида акс этади. Аммо ўз тақдирида из қолдирган инсонлар саноклидир”, - деган эди Суқрот.

Бир инсоннинг ўртача умр кўриш даражаси асрлар, даврлар олдида ҳеч нарса эмас. Лекин шундай қисқа умри давомида асрларга татиғулик буюк ишларни амалга оширган, тарих зарварақларига ўз номини муҳрлаб кетган шахслар барча замонларда ҳам халқ онгида сақланиб қолади. Жаҳон миқёсидаги буюк давлат ва жамоат арбоби, эзгу ишлар бунёдкори,

мустақиллигимиз асосчиси, Ўзбекистон Республикасининг Биринчи Президенти Ислам Каримов ҳам барчага ўрнатқан бўладиган ҳаёт кечириб, халқимизнинг қалбидан жой олди. Мамлакатнинг энг мураккаб ва оғир бурилиш даврида унга йўлбошчилик қилиш учун куч топа олгани, буюк маданият ва тарихга эга бўлган халқни хурликка етаклагани ва Ўзбекистонни ҳеч қайси давлатдан кам бўлмаган давлатга айлантириш йўлидаги ислохотлари, бугунги ёруғ кунларга эришиш йўлидаги собитқадамлиги ва жасорати абадийликка муҳрланди. У ўзининг адолати, мардлиги, жасорати билан бутун Совет Иттифоқи “доҳий”ларини титратди. Бутун фаолияти давомида адолатли сиёсат юритди. Улуғ йўлбошчимизнинг “Адолат ва ҳақиқат ғояси ижтимоий ҳаётимизнинг барча соҳаларини қамраб олмоғи даркор”,-деб айтган жумлаларининг ўзи ҳам фикримизни исботлайди.

Ислам Каримов буюк боғбон сифатида мустабид тузум даврида шундай хурлик ниҳолини эскиди, бу ниҳол бир неча йиллар давомида илдиз отиб, ўз мевасини берди. У қадаган мустақиллик ниҳоли бугун буюк келажак сари жадал ривожланмоқда.

Кўзимда ёш, қалбимда бир энтиқиш. Хаёл беҳосдан шу инсоннинг қилган ишларини эслаш, уни қандай кўз олдига келтиришга қараб кетади. Оломон ичида оташин нутқлари, ўз жонига суиқасд қилишгача борган “сотқинлар”ни кечириши, унинг буюклигидан далолатдир.

У инсоннинг амалга оширган ишларини юқорида келтириб ўтдим. “Бизнинг қандай салоҳиятга эга эканлишимизни кўрмоқчи бўлсангиз, биз қурган иморатларга боқинг”,-деганларидек, ўша иморатларга қаранг. Бошқа сўз айтишга ожизман. Биз мустақиллик ёшлари уруш кўрмай катта бўлдик. Жаннатмакон юртда ҳеч кимдан кам бўлмаган ҳолда ўсиб-улғайдик. Наҳот, битта инсоннинг осмондан туриб бизни қўллаётгани остида ўз юртимиз равнақига ҳисса қўша олмасак? Баъзи бир эрақлар ўз оиласини боқа олмайди. Аммо миллат отаси 25 йил давомида бизни едирди, кийинтирди ва тарбиялади. Еган нон-тузларимизни оқлашимиз шарт. Қолганларни билмадиму, лекин мен мана шу инсонни жуда ҳам яхши кўраман. Ва чала қолган ишимни давом эттираман. Ватанимиз равнақига оз бўлса-да, ўз ҳиссамни қўшаман!

Энди кўнглим хотиржам. Биринчи Президентни сиз билан бирга эсладим. Озгина бўлса ҳам кўзингизга ёш келди. Кўз ёшлар учун ёзилди, у инсонни соғиниш, қилган ишларини яна бир бор эсга олиш орқали.

Буюклар ўлмайдилар, улар ҳар доим тирик: қалбимизда ҳамиша мангу. Биринчи Президентимиз айтган ўша фикрларга амал қилсак ва уни амалда қўлласак, ишонинг, бизни ҳеч ким, ҳеч қачон енга олмайди. Шу жумладан, айни дамдаги Президент Шавкат Мирзиёевга ҳам ишонайлик. Биз мустақил давлатда яшаётган бахтиёр болалармиз. Қўлни-қўлга берайлик! Зеро, бизнинг давримиз келди. Биз сиз хоҳлагандек болаларингиз бўлишга ваъда берамиз, бобожон!

Бобожон, ҳали-ҳамон кўз олдимдасиз,

Буларнинг бари хаёл, туш, эртақ.

Ҳеч қачон ўлмайди, ўзбек юртбоши,

Сиз мангу юрагим, ардоғимдасиз!

Ҳар бир ўзбекнинг ёди, юрагидасиз!

“Вақт – энг катта муаллим”,-деган бир ҳикмат бор халқимизда. Озодликда, мутақилликда кечирилган вақт сабоқлари эса янада буюкроқдир.

Истиклол бизнинг ҳаётимизда янги фаслни, умидлар барқ уриб гуллаган фаслни бошлаб берди. Бу фасл ғунчалари яйраб-яшнаб очилмоқда.

Мен эса бугун ҳам фахрдан, ҳам ғурурдан, ҳам кўксимга сиғмаётган хайратдан хайқиргим келади, дунёларни тўлдириб.

Эй бобо қуёш! Эй тождори олам, кўряпсанми миллатимизни?! Кўряпсанми, ўзбек бобом авлодини?! Унинг шуҳратига, шаънига ҳавасинг келмаяптими сенинг, эй бобо қуёш!

Кеча эмасмиди, “Ўзбекнинг 90%и саводсиз”,-деб тамға босганлари. Кеча эмасмиди, ўзбек болаларини илмга қобилиятсиз, илмга лаёқатсиз деб ёзганлари.

Кеча эмасмиди, ўзбек фақатгина далада ишлашга қодир, унга кетмондан бошқасини ишониб бўлмайди деганлари.

Эй бобо қуёш! Эй олам тождори! Ахир сен гувоҳ эдинг-ку, Ўзбек бобом кудратига?!

Билардинг-ку, юртимиз дунё илму фанининг бешиги бўлганини?!

Билардинг-ку, миллатимиз дунёга қанчадан-қанча даҳоларни тарбиялаб берганини. Билардинг-ку, осмон илмига, тиб илмига, ҳадис илмига, ал-жабр ва бошқа кўплаб илмларга даҳоларимиз кўшган ҳиссасини.

Кўнгилдан кечаётганларини ким биландир ўртоқлашгим келиб, қалбимда тугён ураётган ҳисларимни қоғозга тўкишга ҳаракат қиламан.

Бугунги кунда ҳар бир йигит-қизнинг, ҳар бир ёшнинг қалбида бир олам орзу, чексиз ғайрат ва шижоат. Зеро, юрагида юрт ишқи бўлган ҳар бир фарзанд, жаннатмакон юртимизнинг шаънини, унинг доврўғини юксакларга кўтаришни орзу қилади. Бу орзулар менинг ҳам орзуларим, десам муболаға бўлмайди.

Мустақил Ўзбекистоним! Менга жон қадар жонажонсан. Қадди баланд, кадри баланд Ватанимсан. Сенинг истиқболинг улуғ!

Сен – келажаги буюк давлатсан! Қани энди, тезроқ улғайсам-у, бир новда бўлиб азим чинорга қўшилсам!

Ватаним корига ярасам!

Азиз бобожон! Буюк сиймойингиз қалбимизда мангу яшайди. Сизга муносиб фарзанд бўлиб, Ватанимиз равнақиға ўз ҳиссамни қўшишга ваъда бераман!

Зеро биз, ёшлар, Ватан келажагимиз!